



14. august 2026

UKA 2026/253

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Meeqqat atuarfiani angajullerni atuartunut meeqqat atuarfiani atuartitsinermut tapertaliullugu suliffeqarfimmiisitsilluni aaqqiinermik atortuulersitsinerup iluaqutissartaanik, ajoqutissartaanillu naliliisumik nassuiaasiornissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Aaqqiineq atortuulersinneqassagaluarpat tamanna Namminersorlutik Oqartussanut aamma kommuninut aningaasaqarnikkut, allaffissornikkullu kingunerisinnaasai nassuiaammi aamma nalilerneqassapput. UKA 2027 aallartinnginnerani nassuiaat Inatsisartunut agguanneqassaaq.

(Inatsisartunut ilaasortaq Bo Martinsen, Demokraatit)

Tunngavilersuut

Inersimasunngornermi aallartiffiusariaqartoq inuusuttut amerlavallaarujussuurtut misigineq ajorpaat. Inuussutissarsiorsinnaanermut iluamik ingerlariaqqinnatillu meeqqat atuarfiat naammassisarpaat.

Tamanna imaannaanngitsumik inuiaqatigiinni ajornartorsiutaavoq. Siullertulli inuttut ajornartorsiutaavoq. Kisitsisaatigineqartuni inuusuttoqarpoq piginnaasalinnik, assassorsinnaasunik, nukissalinnik, periarfissalinnillu, nalinginnaasumilli meeqqat atuarfianik ilusilersuisimanitsinnut naleqquttuaannanngitsut.

Demokraatit isumaqarput, unneqqarilluta oqartariaqartugut nalinginnaasumik atuarneq atuartunut tamanut assigiimmik kinguneqarneq ajormat.

Atuartitsineq atuagarsornerinnanngorpallaaraangat, massakkullu meeqqat atuarfiata ilusilersugaanera pillugu namminneerlutik isiginnittaatsiminnik allaaneruallaaleraangat atuartoqarpoq kajumissuseeruttartunik.

Tamanna pillugu Demokraatit isumaqarput, meeqqat atuarfiani atuartitsinermut tapertaliullugu suliffeqarfimmiisitsilluni aaqqiineq aaqqiissutaaqataasinnaanersoq misissussallugu piffissanngortoq.

Meeqqat Atuarfiani angajullerni atuartut nalinginnaasumik atuartitsinermut ataqatigiissillugu ukiup atuarfiusup ilaani, tamakkerluguluunniit sapaatip akunneranut ulloq ataaseq imaluunniit marluk suliffeqarfimmi soorlu assersuutigalugu pisiniarfimmi, assassorluni sulisartuni, neriniartarfinni, allaniluunniit inuusuttunik atuartitsinermi naleqquttuni praktikkernissaannut aaqqiineq taamak ittoq periarfissiisinnaassaaq.



DEMOKRAATIT

Atuartunut piumasaqaatit annikillisinneqarnissaat siunertaassanngilaq, atuartunulli inuussutissarsiorfinnut attaveqalernissaminnik pisariaqartitsisunut kajumissaataanerumik, piviusumullu qaninnerumik atuartitsinermik, taamaalillunilu atuartut meeqqat atuarfiannik naammassinnikkunik inuiaqatigiinnut iluaqutaanissaannik pilersitsinissaq siunertaassalluni.

Tuluttut, kisitsinermillu atuartitsinerit sooq pingaaruteqarnerinik meeqqat atuarfiani atuartitsinermut tapertaliullugu suliffeqarfimmiisitsilluni aaqqiineq atuartunut erseqqinnerumik paasinnilersitsisinnaassaaq. Atuarnerik sumut atorneqarsinnaanersoq atuartut ilaasa takusinnaagaangamikku, taakkununga atuarneq aatsaat isumaqalersarpoq. Kisitsineq uuttortaanermut aamma sananermut tunngatillugu, atuartitsineq ersarinnerulersarpoq. Oqaatsit ilitsersuutinik atuarnermut, isumannaallisaanermullu malittarisassanut tunngatillugu taava atuartitaaneq qanilaarnerulersarpoq.

Ilinniarsimasut amerlanerusut pisariaqartippagut. Tamanna pillugu inuusuttut inuussutissarsiutitigut periarfissat pillugit ilisimasaat annertusassallugit isumaqarpoq.

Meeqqat atuarfiani atuartitsinermut tapertaliullugu suliffeqarfimmiisitsilluni aaqqiineq Danmarkip ukiumi atuarfiusumi 2025/2026-mi atortuulersippaa, taannalu isumassarsiorfigineqarsinnaalluni. Tassunga soorunalimi uagut nammineq atukkatsinnut naleqquttumik ilusissamik nassaassaagut. Tamannarpiaq patsisigalugu siunnersuutiginnilara, meeqqat atuarfiani atuartitsinermut tapertaliullugu suliffeqarfimmiisitsilluni aaqqiineq massakkut atortuulersissagipput.

Aalajangiinissami tutsuiginartumik tunngavissaqarniassagatta siunnersuutigaa, Naalakkersuisut nassuiaasiornissaannik peqquneqassasut.

Aaqqiineq inuussutissarsiorsinnaanermut, suliffeqalersinnaanermut, nammineernerumillu inersimasuunissamut annerumik aqqutissanngorlugu aaqqiineq qanoq aqqissuunneqarsinnaanersoq nassuiaammi ilaatigut nalilerneqartariaqarpoq. Suliame kommunit qanoq tapersersorneqarsinnaanersut nassuiaammi aamma nalilerneqartariaqarpoq. Suliffeqarfinnik, meeqqallu atuarfiinik suleqateqarneq ilaatigut eqqarsaatigalugit.

Demokraatit isumaqarput, meeqqat atuarfianit inuussutissarsiorsinnaalernissamut aqqutissanik amerlanerusunik pilersitsinissamut politikkikkut pisussaaffeqartugut.

Inuusuttut tamarmik assigiimmik pitsaanerpaamik ilikkagaqarneq ajorput. Aamma meeqqat atuarfianni atuagarsornikkut piginnaasanik taamaallaat nalilersuisartumi atuarnermikkut, inuusuttut tamarmik imminnut tatiginertik ineriartortinneq ajorpaat. Imaanngilaq atuagarsorneq pingaarnersiorneqannginnerulissasoq. Naamerluinnaq. Imaappoq, suliassanik paasisimasaqarneq atuartunut amelanerusunut pingaartinneqalersinneqassasoq.



Meeqqat atuariata nukittuup atuartut atuagarsornikkut pikkorissut, atuartullu assarsornermik pikkorissut kivissinnaassavai. Inuiaqatigiisugut ilinniagartuut kisiisa pisariaqartinngilagut, ilinniarsimasulli pikkorissut aamma pisariaqartippagut.

Meeqqat atuariani atuartitsinermut tapertaliullugu suliffeqarfimmiisitsilluni aaqqiinerup inuusuttut amerlanerusut meeqqat atuarianit inuussutissarsiorfinnut pisissinnaappagit, taamaalillunilu meeqqat atuarianit ilinnialersissinnaappagit tamanna periarfissaavoq erseqqissumik misissortariaqagarput.

Neriuppunga siunnersuut Naalakkersuisunit, maanilu Inatsisartuni partiinit tapersorsorneqassasoq.

Pisortanut aningaasatigut allaffissornikkullu kingunerisassai

Nassuiaasiornermut atatillugu aningaasartuuteqassaaq. Taakkua ilinniagartuup ukiumut sulinerani 500.000 koruunit sinnissanngikkai naatsorsuutigineqarpoq.

Namminersortunut aningaasatigut allaffissornikkullu kingunerisassai

Nassuiaammut atatillugu soqanngilaq.

Innuttaasunut aningaasatigut allaffissornikkullu kingunerisassai

Nassuiaammut atatillugu soqanngilaq.